



إبراهيم منصور بدر..

شاعر عاميّه.. تربّي فنّيّا بنادي
أدب الأنفوشي.. بدأ كشاعر غنائي
عام ١٩٩٩، صدر له.. ديوان
شعر غنائي بعنوان صور منك..
عام ٢٠٠٢.. مجموعة شعرية
بديوان مشترك تابع للنشر
الإقليمي بعنوان الحواديت..
صدر أول ديوان مستقل له عام
٢٠١٨ بعنوان هالة..عن دار
الرائدية السعودية للنشر..

ديسمبر.. 1

وغريب أوي ضلّك
يا ناسية أحبابك
ساقية الحبيب مُرّك
ومسنكرة بابك
وغريب أوي عنك
إحساسنا بالفرقة
العيب يكون منك
ولا ف بشر سايقة
أوجاع ومتلظّمة
أمواج دموع فينا
وبقيتْ ليه مبهمة
يا ساكنة ف عنينا؟!!

2

عزفت سنين الأمل
ألحان ألم
وسطور ندم
ودموع..
على كفوف الساعات
فات اللي مات
كل اللي عايش
نبض هائش
صورة من طول الزمن
ألوانها سابت ع الجدار!
فرق النهار م الليل ضعيف
لونك خفيف مدهون مرار!

3

لما تيجي تقولي بكرة
فكري أو استنى فكرة
أو بلاش تستنى حاجة
كل ما في الأمر دمة
ف البداية والنهاية..
كل ناس الدنيا شمعة

جسمها بيدوب يدوب
كل مبتخلص حكاية
البداية النور مكانش
حاضنه ليل ولا ليه نهار
أصلنا قبل النزول
كان هالات ضي ف فضا
واصل السما من غير ستار!

4

لون السما..
ف أيام ديسمبر
يشبه القلب الحزين
المطر والعصف
ولسان البريق
ضيق البيوت
وسع الشوارع
بخر أنفاس..
كل جسم بيرتجف
النور هرب..
من كل بسمة
والخوف..
عبيده مغمضين!